



Inatsisartuni ilaasortaq Peter Olsen, Inuit Ataqatigiit

**§ 37 naapertorlugu apeqquteqaammut nr. 151-imut -
naammassisaqarfiusumik kissamik iluaquteqarneq - akissuteqaat**
Inatsisartut suleriaasianni § 37, imm. 1 naapertorlugu Naalakkersuisunut
apeqquteqarputit UA2017-imi imm. 47-mut atatillugu suliaq pillugu.

06-10-2020
Sagsnr. 2019 - 21353

Postboks 1601
3900 Nuuk
Tlf. (+299) 34 50 00
E-mail: isiin@nanoq.gl
www.naalakkersuisut.gl

Apeqqut 1

UKA2017-imi imm. 47 Inatsisartunit akuersissutigineqarsimasoq,
Naalakkersuisunit suli suliarineqarpa?

Akissut

Naalakkersuisut Nukissiuuteqarnermut Imermillu Pilersuinermik
Immikkoortumut Pilersaarutaat ingerlasuuvoq 2030-ip tungaanut,
anguniakkanillu immikkoortunik arlaqartunik imaqarluni kiassaanikkut pisortat
ingertaannik pilersuinerup annertusaavigineqarnissaanut
nutarterneqarnissaanullu atatillugu.

Nukissiuuteqarnermut Imermillu Pilersuinermik Immikkoortumut Pilersaarummi
ersippoq Naalakkersuisut anguniagaqartut suli annerusumik kissap sinneruttup,
ilaatigut ungasissumiittunik kiassaanikkut iluaqutigineqarnerunissaanik,
(anguniagaq 23).

Tamatuma saniatigut Naalakkersuisut anguniagaqarput ingerlatsivinni
ingerlatsinikkut ingerlaavartumik naammassisaqarfiunerulersinniarlugit
aaqqissuussisoqassasoq, kiassaanikkut kiaap sinneruttup suli annerusumik
iluaqutigineqarnissaanik siunnerfeqartumik, (anguniagaq 24).

Anguniakkat taakkua naammassisinnaajumallugit Nukissiorfiit suliniutinik
aallartitsinikuupput ingerlatsiviit piusut ingerlatsinikkut nutarteriffigiumallugit,
ingerlatsiviit nioqqutissiornermut aammalu siammarterinermut atorneqartut
eqqarsaatigalugit.

Nukissiorfiit ilisimatitsipput kisitsisit paasissutissat maanna pigineqartut
ersersikkaat qitiusumik kiassateqarfiit ilaat amigartumik oqorsagaasut.
Tamatuma kingunerisarpaa kissamik maangaannaq iluaqutaanngitsumik
aniasoqartarnera. Tamanna iliuuseqarfigiumallugu Nukissiorfiit ingerlatsivinni
pitsanngorsaanernik annertuunik aallartitsisimapput, annaasaqartarneq taanna

annikinnerulersikkumallugu. Pitsanngorsaanerillu ilaatigut imaqarput nammineq qitiusumik kiassaateqarfiutini taarsersuinernik.

Kiak sinneruttoq iluaqutigisinnaajumallugu pisariaqarpoq inissiat maanna ungasissumit kiassarnerup siammarterutaasa ruujorit eqqaanniittut kiassaateqarfiup kiassaaneranut ilaalersinnissaat, tamannalu suliasat ilaanni unamillernartortaqtarpoq.

Sisimiuni kiasaanikkut attaviit tamarmik imminut atasunngortinneqarput, tassani ilaalluni ikuallaavimmiit kissamik pilersuineq, siunissami eqqakkanit ikuallatanit kiassaaneq annerusoq iluaqutigineqarsinnaaleqqullugu.

Qaqortumi ungasissumiittunik kiasaanermi nioqutissiorneq ilaatigut imaqarpoq erngup nukinganik iluaquteqarluni nukissiorfimmiit innaallagissamik tigooraanermik, eqqakkanik ikuallaanikkut kissamik tigooraanermik aammalu uuliatortunik kiassaateqarfinneersunik tigooraanermittaaq. Elværkimiit kissamik sinneruttumik iluaquteqalersarneq taamaallaat pisarpoq erngup nukinganik iluaquteqarluni nukissiorfiup nioqutissiunngiffiini.

Immikkoortumut pilersaarut aamma piffissamut ungasissumut sammisunik anguniagaqarpoq, pisortat nukissiuuteqarnikkut 2030-imi pilersuinerat sapinngisamik annertunerpaatigut nukissiuutinit piujuaannartitsisunit pineqartassasoq. Tamatumani erngup nukinga aammalu kiasaanermi teknologiit nutaat nunatsinni sumiiffinni tamani ilaassapput, teknikkip tamatumunnga atorpeqartup ingerlatsisinnaalerneratigut, aammalu nunatsinni inuiaqatigiit aningaasarsiorneranni tamatuma artornangitsumik nammassinnaalerpagu.

Nukissiuutsit piujuaannartitsisut amerliartornerat ilutigalugu diesel-itortunik atortorissaarutit kissamik sinneruttumik iluaquteqartarnerat annikilliarussaaq. Tamanna sumiiffinni arlaqartuni atuutissaaq.

Tamanna assersuutigalugu atuutissaaq Qasigianguani aamma Aasianni, ullumikkut pingaarnertut ikummatissanik nunap iluaneersunik iluaquteqarluni pilersuiviusuni, Naalakkersuisut sulissutigimmassuk aalajangiiffigisassatut siunnersuut, erngup nukinganik iluaquteqarluni nukissiorfiliornissamik, illoqarfinnik taakkuninnga marlunnik pilersuilertussamik.

Taamaattumillu kissap sinneruttup Qasigianguani aamma Aasianni iluaqutigineqarsinnaaner at pillugu aalajangernissap ajoqutaanngitsumik utaqquarsinnaavaa Qasigianguit aamma Aasiaat erngup nukinganik iluaquteqarnikkut pilersorneqalernissaat pillugu aalajangiinissaaq.

Tamanna aammattaaq atuutissaaq assersuutigalugu ukununga, Nanortalik, Maniitsoq aamma Paamiut, Naalakkersuisut suliaqartussaammata nukissiuutini piujuaannartitsisunik iluaquteqarluni pilersuilernissamut atatillugu aalajangiiffigisassatut siunnersuummik.

Tamannattaaq aamma atuutissaaq erngup nukinganik iluaquteqarluni nukissiuuteqarnikkut Nuummik pilersuinermtut atatillugu. Nuummi aamma eqqakkanut ikuallaaviliornissaaq pilersaarusiorneqarpoq. Nukissiorfiit nalunaarput Nuummik nukissiuuteqarnikkut pilersuineq ullumikkut pingaarnertut erngup nukinganeersuusooq. Tamatumunnga atatillugu Nukissiorfiit nalunaarpaat eqqakkanik ikuallaanikkut kissamik pilersinneqartumik Nukissiorfiit ungasissumiittunik kiassaanerannut ilanngussisoqassapat, tamanna taamaasilluni uuliamik atuinermik peersitsissanngilaq, paarlattuanilli erngup nukinganit nukissiornermik illikartitsissalluni, taamalu nukissiuummik piujuaannartitsisumik.

Ilulissani Paakitsumi erngup nukinganik iluaquteqarluni nukissiorfik suli ullumikkumiit annertunerusumik innaallagissamik nioqutissiorsinnaavoq. Taamaattumillu Nukissiorfiit 2018-imiilli sulissutigaa ajornarunnaassasoq sullitat suli amerlanerusut ungasissumiittumik kiassaanermtut attavilersornissaat, imaluunniit innaallagissamik qamittakkamik kiassaateqalernissaat, erngup nukinganik nukissiorfimmiit pilersorneqalersinnaaqullugit.

Taamaasillutillu Nukissiorfiit inuussutissarsiornermik ingerlatsisuni sullitani kiassaanikkut annertuumik pisariaqartitsisartuni imermik kissaavinnik ikkussuisimapput, pilersuinermtut siammarterutaasunik annertusaasimallutik, sullitat suli amerlanerusut attavilersorneqarsinnaaqullugit.

Nukissiorfiit pilersaarutaat naapertorlugit erngup nukinganik iluaquteqarluni nukissiorfiup pilersuisinnaassusia tamakkerlugu atorneqalissaaq 2023-imi, uuliatortunillu atortulersuuteqarneq peersissallugu.

Apequt 2


Tassunga tunngasumik Naalakkersuisut allamik oqaasissaqarnerpat?

Akissut

Naalakkersuisut paasissutissanik allamik ilassutissaqanngillat.

Inussiarnersumik inuulluaqqusillunga

Med venlig hilsen



Steen Lynge